

遼陽縣志

戊辰夏
比頌

戊辰
秋刊

遼陽縣志

張濟民題

前遼陽州志序

今天下車書大同聖天子嘉意文治詔天下郡縣修志匪誇文事興吏治也夫天下大矣廣谷大川異勢民生其間者異俗前人之治後人取而神明之阜民善俗之道也師心自用恐無成效予以康熙拾捌年仲秋奉命來遼目擊心愴平原曠野可井而賦可溝而塗今一望蒼莽風烈氣肅樹木少植三春罕間關之和炎夏無蔭庇之影百里村落茅茨石壘甕牖繩樞男婦百結予口商心計所以爲治者索前人之政蹟不可得僅得一二於故老遺民多鼎革流離之事少知前人招徠拊循之術甚以爲憾夫大創之後非有善政良法不能有濟稽自古循良之吏必招集流散勸之樹藝蠲其租稅而後桑麻鬱然野無曠土竊意今之遼陽必得循良之材撫字教訓則戶口滋多賦稅自廣裕國裕民予有志焉而未逮也竊不自量政事之餘講求前人舊治叅以今日時事與紳士耆老商榷何者當因何者當革何者當興若何招集若何勸撫故土荒坵若何而墾闢城郭若何而修理倉庫若何而積蓄使數十年間盜竊不生凶荒有備民嬉於耕稼士習於詩書體前人之意

前遼陽州志叙

志者記也所以記善惡昭鑒誠也史類也或曰志與史異史記善惡志記善而已然則非胸有明識筆有斷制者能乎哉遼陽今爲屬州我太祖肇基之後良法善政缺焉未述太史公曰主上聖明而得不布聞有司之過也功臣世家賢大夫之業不述罪莫大焉楊公蓮峯鑣者爲州一年餘士習民安百廢修舉乃汲汲謀所以志者然簿書期會強半車塵馬足間重視其事欲以屬予予曰嘻有是哉懷珠而求蚌乎楊君曰談何容易昔司馬遷作史記父子世其官班固以戚屬家有賜書多賓客故能成漢書予今者日從事於車塵馬足間又安能今子見聞廣閱歷老謀而益壯又以足疾閒休不出心專力暇莫宜於子矣予曰然然否否閱歷見聞予則安能老疾不出則誠有之又安辭於是發篋取其所採錄者有疑則質諸楊君以博訪於父老紳士之遺逸者而登之凡旬餘日而成不敢云以記善惡招鑒誠亦惟紀載以備將來之採擇云抑予有請於楊君者昔宋仁宗以劉煦所撰唐書卑弱淺陋命歐陽永叔宋子京刊修之歐宋刪繁舉要事增於前文省於舊十七

前遼陽鄉土志序

遼陽於古爲邊徼用武最著之地其名見於史書及文人詩賦數矣顧或爲郡治或爲國治或爲府治縣治路治衛治其建置沿革旣勞然靡常而載籍復多闕略故往時疆域多不可攷國朝康熙間由縣升爲州時猶是軍制幅員廣而人民稀其後農及工商乃稍稍由燕齊遷入地利大闢戶益繁息文學亦彬彬尙焉光緒丙午劃東南隅爲本溪縣西北隅爲遼中縣而四至遠者猶及百二十餘里戶口猶及七十萬人不失爲關東繁庶鉅治然而有庚子拳匪之亂甲辰日俄之戰盜賊蠡起烽火頻仍居民不得安枕者屢歲至今城郭不完元氣大耗又約定開闢商埠計今境內日人多至五千有奇郭外南滿鐵軌逶迤橫貫主客競爭之勢盛衰倚伏之機氣象又大異矣世變日劇來軫方適數典不忘居今稽古寧非都人士之責歟丁未冬余奉檄權州事下車伊始訪求州志則二百餘年以來尙未裒有成書即舊時案牘亦燬於兵燹掌故無徵文物凋喪爲悵望者久之適學部有編輯鄉土志之令余以催科撫字卒卒未遑商之鄉薦紳永君貞廣爲甄采每一篇成

必函示余爲之審定其事大抵據正史一統志盛京通志及耆舊傳聞間有事屬遼東而不能稿指爲何地者姑並著焉寧備無闕凡爲綱二爲目二十九附以圖表計上下二卷閱半載告成既以達部邑紳袁君金鎧等請以付梓屬弁序言余惟周禮外史掌四方之志注謂若晉之乘楚之禱枕魯之春秋是一國之志其流波即一代之正史之所取裁其濫觴即萬姓譜牒之所推衍蓋必有家而後有國有國而後有天下故曰克明峻德以親九族九族既睦辨章百姓百姓昭明協和萬邦是其序也今志乘既闕族姓又乏土著譜牒之著錄邈焉無聞外侮且乘之而至則是書之存又烏能已永君之苦心將於是不可沒已抑又聞之政貴有恒辭尙體要是書一限於時代之變更一限於舊聞之荒落一限於部定之例目之不可得而更易有此三難知不免爲通人所詬病然錄事命意不敢稍涉鋪張於近今政治尤得失較然鉅細必錄庶幾史裁政體兩存其真後有達人博采旁蒐軼成完帙俾赫赫名城不致終古守此椎輪大輅是則余與永君所區區瓣香引領者夫

光緒三十四年歲次戊申九月既望知州事寧鄉洪汝冲謹序

前遼陽鄉土志序

人有愛鄉心而後有愛國心不能愛鄉而謂能愛國者是譌語也夫先人堂構雖艱窘藏雖富而後人不之知則舉而棄之也必不甚愛惜人之於鄉亦猶是數百年來文人學士敝精帖括舉天地之大萬物之多而惟應試之知雖生斯長斯之鄉出門跬步任舉一名一物有茫然莫辨者故一旦受外人激刺之危覺此鄉於吾直若渺不相關而放棄於不顧則以愛鄉心早銷滅於隱微之中而不覺也鄉且不愛何有於國然欲人知愛鄉必先使人知此鄉之歷史沿革及往事現勢之經營締造人事天產皆足寶愛有不容漠然置之者則愛之之心自油然而相生相依而不能忽然則鄉土志一編胡可少哉矧當百度維新之際變法更章日異而月不同而巡警教育自治諸新政既以次迭舉倘無研究鄉土之情形參定適宜之法俾與此鄉之歷史地勢民情相稱流弊且不可勝言則鄉土志一編更胡可緩哉余友邑紳永君佩珩承提學憲命與遼陽諸紳分類調查編輯遼陽鄉土志將付梓知州事洪味丹刺史既爲之序余亦深喜是編之成其關係有非淺鮮者自

光緒三十四年十月朔日遼陽警務長王永江書

遼陽縣志序

周禮外史掌四方之志是爲志之權輿志者記其事也凡境內之天文地理人事物產風俗之純澆政治之沿革悉筆之於書上備探問俾悉天下形勢可坐而致也下備率由俾悉古今精神可擇而取也噫志書不綦重歟然而志豈易言哉以見聞莫及之事成信而有徵之書考之案牘半屬淪亡徵諸鄉評多持異議且偏隅施措未必載實錄之篇一節可風不盡傳後人之口此而欲搜訪無遺即老於典故者猶憂憂難之況在未嘗學道之風塵吏耶民國乙丑秋余奉檄承乏來遼下車伊始存觀風之意索閱縣志尙付闕如僅檢得鄉土志一卷閱訖知係清光緒戊申年所編原限於部令條款答其所問方之縣志程式簡略殊多惟思邑志之闕令之責也正擬籌款興修時值省憲通令修志之文亦行頒到遂益視爲急務爰邀紳耆囑推蓄道德能文章者當之僉曰前代理奉天省長白公佩珩胸有明識筆有斷制鄉土志爲其手編以之總理其事駕輕就熟定有可觀因函邀來署面述所願慨然見允於丙寅八月辦起祇以年湮代遠文獻旣已無徵搜羅又恐遺

漏正在苦無依據之時邑紳袁公潔珊由都門抄來州志草稿一部展開係清康熙辛酉年刺史楊公蓮峯所編輯迄今二百四十餘年矣時移事異前者尙可因仍後者仍多疑難緣甲午庚子兩經變亂所有卷冊焚燬無存所幸白公與同事諸紳徧查史乘窮覓碑碣竭力搜求不肯因難中輟雖云重修實創舉也閱六月而草創初就得六編凡四十卷白公授余曰聊以應諾待審定焉時余轉任奉天清丈局坐辦匆匆將別舉稿審閱不禁惜喜交并而且慮焉所惜者尙未核訂付梓未竟其事也所喜者起二百餘年不傳之廢典值余將去而大致告成也所慮者志與史異史者大書特書有褒貶并有予奪志者善善從長多獎藉而少黜斥使觀之者無炯戒之心而生冀倖之念其與維繫世道人心之謂何雖然前者後之師也往者今之鑑也倘官斯土者覽志中名宦若而人而怦然動曰必若此而後爲良有司也生斯土者讀志中列傳若而人而油然興曰必若此而後爲名賢高士也他如風俗如何而稱爲淳美警學如何而稱爲完善農商如何而稱爲發達工藝如何而稱爲精粹使觀感者比例而興觸類而起蒸騰日上則是中華之幸斯邑之幸

亦編者之幸也余臨別贈言謹附鄙見俟就正於後之君子焉是爲序
中華民國十六年歲次丁卯孟夏吉旦知遼陽縣事法庫裴煥星撰

遼陽縣志序

粵自郡縣置而列國之史亡史亡然後志乘作是邑志固國史之遺也其記載時事昭往式來義一而已第史畧而志詳不無稍異何者國政民風勢有偏重體固然也余昔未領縣時常念及此每謂縣志必不可闕然以權不我屬卒亦有志未逮民國七年冬奉檄署理長白人民土地咸舉而負荷於一身顧前令去矣政誰我告問及邑志左右皆曰設治未久尙未遑也余乃喟然嘆曰長白今雖小邑舊則府制況在昔爲有清發祥重地於今爲全省極東邊徼其間道化之翔洽淳風之漸被獨無可續述紀錄以垂後世竟使之泯泯無聞若此良可惜哉噫是誠長縣者之咎也於是銳意爲肇修之舉而地苦瘠貧民多椎魯歟與人兩難之遷延至十四年省署下令纂修縣志乃爲之請欸於上並手訂辦事章則期以親終其事而觀厥成詎部署甫就而奉命調任斯邑邑固號稱繁劇人文之盛獨冠全省縣志之成必不後人以爲修志之役固與余無緣也下車之後索閱新志舊令告余曰因欸紕進行甫及半觀成尙有待余不禁色然喜喜蓋喜余之素願雖不得償於任

事最久之長白而猶得償於甫經受篆之遼陽顧非幸歟邑紳躋躋羣力進行袁公潔珊藏書最富代爲搜羅事實白公佩珩編輯勤勞號稱宏博歷時既久蔚成巨觀適值金融變動經費告竭刊印書費更付闕如無米爲炊遽形停頓當經據情面懇婉請增加幸大府鑒察准支鉅款而袁公潔珊更允志書印成負提倡勸銷之責俾風行一世藉減刊費之資一種委曲觀成之心聞者欽感遂得賡續纂修又六月而書成條分縷析綱舉目張事物昭而得失明文獻詳而興衰著一開卷間因革損益代謝往來與夫國計之盈縮民生之休戚犁然在目雖未可以方諸列國之史而詳略適宜亦成一家回視夫茫然莫考者其相去又不可以道里計矣竊謂是編出舊令可不煩而告而忠自存新令可不竣咨諏而政自悉邑人可不假師資而行有據其有裨於遼陽之治理豈淺鮮哉雖然傳述易創作難以遼陽之戶口富庶物產豐盈至今日而追溯數百年前之故實能無舛且遺乎是惟盡其在我而已若夫訂訛補略節陋芟繁俾成一邑全書則尙有竣于後之宏覽博物君子也謹書簡端以爲將來之蒞茲土者告當志書告成之日正余拜命協理清丈

中華民國十七年四月潢南董英森撰